

Daiga Laizāne: «Latgališu volūda namonūt īguojuse munā kasdīnā»

Inga Kaļva-Miņina



Byut par dī-džeju ir vīna nu Daigys aba DJ Deila sirdslītom.

Foto nu D. Laizānis personeiguo arhiva

Tai kai 13. februārī tiks atzeimāta Pasauļa radejis dīna, tod itamā reizē iz sarunu aicy-nuoju cylvāku, kuru taišni dorbs radejā atgrīze atpakaļ iz Latgolu, ļaunūt gon rodūši struoduot, gon pylnveiduot sovys latgališu volūdys zynuošonys. **DAIGA LAIZĀNE** (kura zynoma ari kai DJ Deila) ir vīna nu raidejuma ļaunīšim “#5BREINUMI” vadeituoju i Latvejis Radejis Latgolys studejis multimedēju satura redaktore, kura ir lobs pīmārs tam, ka Latgolā ari ļaunim cylvākim ir, kū dareit.

Sarunys ar cylvākim īdvesmoj

«Kai radejis raidejuma «#5BREINUMI» vadeituoja struodoju nadaudz vairuok kai divi godi, bet papyldus kai multimedēju specialiste – majā byus jau divi godi. I divi godi, kai dzeivoju Rēzeknē. Pyrms tam es brauču nu Reigys voi attuolynuoti īraksteju raidejumus,» stuosta Daiga.

«Tādiņ veidoju digitalū saturu deļ Latvejis Radejis Latgolys studejis raidejumiem vysom socialūs medēju platformom, kuruos asam atrūnomi, – Facebook, Twitter, Instagram, TikTok. Rodu saturu, apstruodoju tū, veidoju publikacejis, tāt saīt rešuok, bet paraleli vodu ari raidejumu «#5BREINUMI». Tāt naasu vairs raidejuma producente, bet turpynoju turēt rūku iz pulsa i paleidzēt, ja kū vāga. Tāt raidejuma producente ir Amanda Anusāne, kas cīši labi teik golā ar sovu dorbu,» par sovīm tādinejim dorba pīnuokumim stuosta Daiga. «Niu asam puorguojuši iz podkāsta (*raidīroksta – I.K.-M.*) tipa sarunu, i studejā ar vairuokim gostim runojam par kaidu vīnu konketru temu. Runojam par plašuokom temom, kab cylvākam sarunu byutu interesanti klauseitīs jebkurā laikā, ari naatka-reigi nu godalaika.»

Atcerūtīs intervātūs cylvākus, Daiga atzeist, ka kotra saruna jū īdvesmoj i snīdz ari daudz ļaunys informacejis. Pīmāram, naseļ jei uzzzynuoja, kas tys par naparostu sporta veidu ir skijorings. Cīši interesanta pīredze asūt bejuse, intervejūt prīsteri Rodionu Doļu. «Nikod nabeju interviewjuse prīsteri. Laika gaitā mums ir rodušīs stereotipi par kaidys konketrys profesejis puorstuovi. I tod, kod tu jū sateic, tod saprūti, ka jis ari ir cylvāks, kuram pateik pajūkuot, kurs soka, kū dūmoj. Beja interesanti prīsteri Rodionu Doļu īpazeit kai personeibu. Taidu prīsteru vādzātu vairuok,» soka Daiga.

«Cīši pateik, kod dūdamīs pi cylvāku iz sātu, iz školom. Var redzēt, ka tod, ja atbraucam pi cylvāku, tod sovā vītā jī jūtās drūsuoki, kab runuotu ar mums, i vairuok atsaver, nakai byutu studejā. Paguojušajā godā raidejumā vairuok suokom intervēt taišni ļaunīšus, navis sabīdreibā atpazeistamys personeibys. Daugovpilī, Viļānūs, Preiļūs, Varakļonūs satykom cīši feinus ļaunīšus. Beju puorsteigta, cik jī ir attapeigi, izgleituoiti, dzeivisgudri,» soka Daiga, pībylstūt, ka sarunys ar ļaunīšim īdvesmoj i ļaun apszynuot, ka nuokūtne byus lobuos rūkuos.

«Školāni nasaklausa radeju. Kod braucam iz školom, daudz nīmoz nazyna raidejumu «#5BREINUMI». Radejis klauseišonuos nav populara nūdarbe ļaunīšu vydā. Deļtam mes puorejam iz podkāsta tipu, kū ļaunīši tāt klausuos. Ir svareigi ļaunīšus radeit interesi par dažaidom temom taišni caur socialajim teiklim – eipaši Instagram i TikTok. Ķaunīti pīsaisteit iz divdesmit minutu i daudz, tod radeitajam saturam ir juobyut cīši pīsaistūtšam. Ja ir eisuoiki video, tod leluoka varbyuteiba, ka myusus vairuok saradz, sadzierd,» atkluoj multimedēju satura redaktore.

Kas vēl radejis raidejumā «#5BREINUMI» ir pasamai-nejs divu godu laikā? «Suokumā bejom taidys dīzgon lels ļaunīšu bareņš, ari vydsškolāni, kas veiduoja raidejumu. Tāt nu jau godu asam stabils sešu cylvāku – es, Juoņs Pampe, Edgars Provejs, Baiba Baltace-Saukāne, Līna Lontone i Amanda Anusāne – kolektivs. Maņ pateik myusu komanda. Mums ir cīši loba mijīdarbeiba, varam pasaļaut vīns iz ūtra, jīutam, kuram kura tema lobuok der. Nu jau ūtrū sezonu turamīs vysa komanda kūpā,» stuosta Daiga.

Arviņ vairuok runoj latgaliski

Struodojūt Latgolā, Daiga jau drūši runoj latgaliski, bet atzeist, ka vēl aizviņ i taidi latgališu volūdys vuordi, par kuru pareizu izrunu jei nav eisti puorlīcynuota. «Atcerūs, ka, vodūt pyrmūs raidejumus, laikam beju sorkona kai tomats. Vysu laiku pasavīeru lapeņā, kai pareizi izrunuot vuordus latgaliski. Tod ari vairuok gataviejūs raidejumim, vairuok dūmuoju, kai kū pasaceit. Tāt vyss jau saīt, ir vīgluoka sajiuta, ari vodūt raidejumus. Bet ari tāt, kod navaru pasaceit latgaliski, pasoku tū vuordu latviski,» soka Daiga.

«Ja muna baba byutu dzeiva, jei tāt lepuotūs ar mani. Kod atbrauču gostūs, es mieginuoju ar jū runuot latgaliski. Tik labi tod nasaguoja, bet tāt jau es vairuok runoju latgaliski, ari rokstu. Saimē bīži viņ ar sovejim runoju latgaliski. Interesanti, kai latgališu volūda namonūt īguojuse munā kasdīnā,» atkluoj Daiga.

Daigai pateik dorbs radejā – tys ir interesants, izgleitojūšs, tuklūot jei pošā var plānuot sovu dorba dīnu: «Maņ pateik, ka sovu kasdīnu varu regulēt pošā, ar izjāmumim, kod ir raidejuma īroksts. Visbīžuok pīsadolu kai raidejuma vadeituoja voi multimedēju satura specialists. Asu dīzgon naatkareiga i pošā plānoju sovu dorba laiku. Kod ir situa-cejis, iz kurom uotri juoreagej, tod asu kluot. Dorbs nav garlaiceigs, ir satura veiduošona – filmiešona, fotografiešona, dažreiz braucu leidza raidejuma vadeituojim voi žurnalistim i asu kai atbolsts. Varu struoduot nu sātys, bet, kod ir napīcīšameiba, tod ir dorbs studejā. Maņ pateik, ka Rēzeknē vyss ir tyvu. Ari, ja pieški vāga byut studejā, tod tuos ir 10 minutis, kū atīt nu sātys. Ir cīši labi te dzeivuo-ut. Ja kaidys maņ tāt vaicuo-ut, voi grybu atpakaļ iz Reigu, sacātu, ka pagaidom nā.»

Daiga ir lobais pīmārs, ka ari ļaunim i izgleituoitim cylvākim ir daudz kū dareit Latgolā: «Ir svareigi pošam byut atvārtam, tod ari atrassi sev apleik cylvākus ar kūpeigom interesem. Rēzeknē ir vyss, kū vāga, – ir koncertzals, ir īspīeja apmeklēt dažaidys teatra izruodis, var doncuot, dzīduot, slīduot. Tys vyss ir 10 minutu attuolumā. Napaseļ suoku spēlēt ari basketbolu, kū nabeju darejuse kūpš vydsškolys laikim. Reigā es tū nadareitu, byutu juo-brauc lels gobols nu vīna punkta iz ūtru, byutu daudz na-lītdereigi patārāta laika. Latgolā ir daudz kū dareit, bet vysu var paspēt, deļtam ka tī attuolumi ir mozuoki. Nav tuos leluos pīlsātys steigys. Maņ pagaidom ite ir labi.»

Atrūn laiku dažaidim hobejim

«Maņ ir pīrks, ka Latgolā i Latvejis Radejis Latgolys studeja. Mums ir daudz nūtikšonu, par kū viesteit, mums ir myusu latgališu volūda. Mes varam stuosteit par Latgolys cylvākim, par kurim cyti varbyut napastuosteitu. Pīrks, ka atsateista nūvodu socialuos platformys, i jī stuosta par tū, kū dora kasdīnā. Ir svareigi ziņuo-ut par tū, kas Latgolā nūteik, cytaižuok tī, kas dzeivoj Reigā, vēl aizviņ dūmuos, ka Latgolā dzer šmakovku i staigoj postuluos,» soka Daiga.

«Atcerūs, kod brauču iz Rēzekni, maņ vaicuoja, kū es te dareišu, ka navariešu te byut dīdžejs. Tod es dūmuoju, ka laikam Latgolā munā dīdžeja dorbā byus pauze, nu tod turpynuošu sadarbeibu ar Reigu itamā jūmā. Pyrmū godu pabrauquoju iz Reigys pusi paspēlēt, bet tāt tai eisti i vairs nav laika braukt iz Reigu, partū ka vyss nūteik Latgolā. Ari te ir pīprasejums. Ja gryb, tod ite ir, kū dareit,» puorlīcynuota Daiga.

Kur Daiga smelās spēku? Jau pīmynātais dīdžeja dorbs ir vīns nu enerģejis olūtim, taipat ari doncuošona ļaunīšu deju kūpā «Dziga»: «Doncuošona maņ paleidzēja paguojušajā godā tikt uorā nu sova veida depresejis. Nabeju doncuojuse ostoņus godus, bet «Dziga» mani cīši labi uz-jēme. Paguojušajā godā suoku aukstuos peļdis. Maņ pateik iudiņs. Oktobra beiguos beju Spāņejā, i tī iudiņs vairs nabeja tik sylts. Sērfojūt pavadeju daudz laika iudinī, lai ari beju hidrā, kod atbrauču iz sātu, saprotu, ka grybu tū iudiņa sajiutu saglombo-ut, tys ir breids, kod ataslādzu nu vysa. Tai mes ar kolēgi Amandu Anusāni suokom aukstuos peļdis Adamovys azarā. Vēļ maņ paleidz dažaidi sporta veidi, pīmāram, snovbords. Ja nabyutu Rēzeknē, tod dzeivuo-ut Līpuojā, – tur ir jiura, i zīmā tī var sērfo-ut. Maņ ir vajadzeiga ari saimis sajiuta, draugi. Sasatikšonys ir svareigys, kab justīs labi. Ari pasuokumu apmekliešona īdvesmoj.»



Foto nu D. Laizānis personeiguo arhiva

Raidejuma «#5BREINUMI» smaideiguo komanda – Edgars Provejs (nu kreisuos), Amanda Anusāne, Baiba Baltace-Saukāne, Juoņs Pampe i Daiga Laizāne (foto nav radzama Līna Lontone)



Foto nu D. Laizānis personeiguo arhiva

Vīns nu Daigys (ūtrajā ryndā pyrmuo nu lobuos) enerģejis olūtim i doncuošona ļaunīšu deju kūpā «Dziga»



Foto nu D. Laizānis personeiguo arhiva

Daigai pateik iudiņs, i, ja jei nadzeivuo-ut Rēzeknē, tod dzeivuo-ut Līpuojā, kur ir jiura i ari zīmā var sērfo-ut

Kū Pasauļa radejis dīnā Daiga nūvāl sovīm kolēģim? «Na kotra dīna mums ir vīgla, nu molys varbyut izaver vīnkuorši, bet dorbs ir sarežģeits. Nūvālu napazaudēt dzeivis-priku i napazaudēt vīnam ūtru. Mums tāt ir cīši lobs kolektivs, i gribīs, kab mes nasadadzynuotu sevi dorbā. Ja jīuti, ka tyvojās tys breids, kod ir gryuši, vāga pasadaleit ar cytim, ja gribīs pajimt pauzi, tod vāga vīnam ūtru atbaļsteit. Ir juosaprūt, kas kotram ir tei burvju tableteite, kas var paleidzēt. Munā gadejumā maņ paleidz ceļuošona,» soka Daiga, uzsverūt, cik svareigi ir pasaryupēt pošam par sevi. Taipat sovīm kolēģim jei nūvāl, kab byutu daudz lobu nūtykumu, par kurim viesteit puorejai Latgolai i Latvejai. ▣

«Projektu finansē Mediju atbalsta fonds no Latvijas valsts budžeta līdzekļiem». «Par projekta raksta «Daiga Laizāne: «Latgališu volūda namonūt īguojuse munā kasdīnā» satura atbild SIA «Vietējā»».

MAF

Mediju atbalsta fonds